



Jumat, 01 Januari 2021
Ogen: Masmur 19: 1-7



Teptep Wari Erberita



Dibata ersura gelah kerina tinepaNa naksiken kemuliaanNa. Manusia banci ersaksi arah kata, perbahanen i bas kegeluhenna. Ersaksi/ erberita labo seri ras sekalak reporter. Adi reporter nuriken kerna pengalamen ras kesaksin kalak sideban. Tapi, adi ersaksi nuriken pengalamen pribadi uga kerna kegeluhen si ipasu-pasu Tuhan. Labo manusia ngenca ersaksi tapi rikut pe kerina tinepana alu cara si pelain-lain. Bagi oratenta sendah masmur Daud nuriken kerna luasna ras muliana tinepa Dibata e. Kerina ijadiken Dibata mehuli, ras malem ate Dibata natapsa. Sora angin si erdeso, sora lau maler terbegi, bulung-bulung landek mole-ole, sorak perik rende alu sore si merdu. Teptep erpagi-pagi kerina ia muji Tuhan, tuhu-tuhu ibabai kita ngataken bujur man Tuhan. Wari pemena i bas tahun si mbaru ibereken Tuhan kesempatan man banta medak erpagi-pagi, e pe nuriken kuasa Dibata man banta bage pe man doni enda. Tangkas siidah, langit ras awang-awang tinepa Dibata si isusun Dibata harmonis pergerakenna, teratur pergantinna janah ngasup erberita kempak wari si pagina. La terukuri kita secara logika tinepa Dibata e. Emaka, alu carana si ibahan Dibata kerina tipenaNa mahanca meriah ukur Dibata janah ngangkai cara tinepaNa e mujiken Ia. Payo carana dengen sorana labo bagi manusia rende, tapi Dibata metehsa dengen ngangkaisa maka langit ras awang-awang mujiken Ia. Selamat Tahun Baru man banta kerina! Sinikmati wari si mbaru bas tahun si mbaru enda tetap alu pengarapen kempak Dibata saja. Siingetlah, bage teraturna Dibata ngaturken perdalanan wari-wari, bage ka nge Dibata ngtaurken perdalanan kegeluhenta. Kerina siiaturken Dibata tama kiniulin ras kejuah-juahen banta ras doni enda. Alu penggejapen Tuhan nemani dengen ngaturken kegeluhenta mehuli dengen bagi si ngena ateNa, mari sibenaken kegeluhenta i bas keriahen ukur dengen semangat si mbaru. Adi bulung-bulung ras perik-perik pe ngasup muji Tuhan teptep erpagi-pagi, sora angin si rembus ras lau maler pe terbegi, wari lepas wari pe nuri-nuri kerna kiniulin Tuhan, me perlu nge kita pe teptep wari erberita kerna kiniulin Tuhan?

Tahun si mbaru semangat muji Tuhan pe reh mbaruana